

Programska izjava 2019.

U protekle četiri godine Naša stranka nastavila je svoje ideološko profiliranje, smještajući se kao socijalno-liberalna stranka u lijevi centar političkog spektra. Taj proces završen je 2016, pristupanjem Alijansi liberala i demokrata za Evropu (ALDE), a ispravnost naše ukupne orijentacije potvrdili su najprije lokalni izbori 2016, kada je stranka udvostručila broj opštinskih vijećnika, a zatim i opšti izbori 2018, na kojima je stranka ostvarila najbolji rezultat dosada: prisustvo u Parlamentarnoj skupštini BiH, Parlamentarnoj skupštini FBiH i pet kantonalnih skupština.

Naš glavni organizacioni cilj u naredne četiri godine jest nastavak širenja u Federaciji, kao i uspostavljanje struktura NS u Republici Srpskoj i Brčko distriktu. Ti napori bit će popraćeni institucionalnim prilagođavanjem koje zahtijeva prerastanje male stranke u stranku srednje veličine.

Naši programski ciljevi ostaju nepromijenjeni: jačanje vladavine zakona u svim njenim aspektima (odgovornost nosilaca javnih funkcija i državnih službenika, iskorjenjivanje nepotizma i korupcije, nezavisno sudstvo), strateška usmjerenost ka održivom razvoju i definiranje uloge države kao davaoca dobara i usluga koje slobodno tržište ne može da osigura – što uključuje i pomoć članovima društva koji su u procesu tranzicije ostali u nepovoljnijem položaju.

Naše djelovanje na ostvarenju tih ciljeva odvijat će se u uvjetima permanentne političke krize: odugovlačenje u obrazovanju vlasti nakon izbora u oktobru 2018. svjedoči da vladajuće snage u društvu nemaju ni volje ni mogućnosti da djeluju u javnom interesu, pa čak ni da taj interes prepoznaju.

U tim okolnostima, Naša stranka potvrđuje svoju predanost evropskom i euroatlantskom putu Bosne i Hercegovine, što za nas znači strukturirano i postupno *mijenjanje* – a ne očuvanje – dejtonske ustavne strukture, kao nespojive sa zahtjevima članstva u EU. Zalagat ćemo se da se te promjene izvode po principu *funkcionalnog minimuma*, prema kojem se centralnoj državnoj vlasti povjeravaju samo one nadležnosti koje članstvo u EU zahtijeva, ali ne manje od toga.

U skladu s tim opredjeljenjem, suprotstavljat ćemo se svim pokušajima da se izmijeni izborni zakon prije nego što se organi za koje se izbor vrši promijene u skladu s presudama Evropskog suda za ljudska prava. Postupiti suprotno značilo bi svjesno izgubiti još četiri godine na putu u Evropu.

Naša stranka potvrđuje da je osnovni subjekt političkog i društvenog života građanin-pojedinac, čija su prava ograničena samo istim takvim pravima drugih, i ne mogu se kršiti u ime bilo kojih kolektivnih prava, ideologija ili državnih ciljeva.

Naša stranka potvrđuje svoju predanost očuvanju legitimnih kolektivnih interesa konstitutivnih naroda i Ostalih u Bosni i Hercegovini. Uspješna zaštita kolektivnih prava zahtijeva da se ona taksativno nabroje u ustavnom tekstu; institucionalni modeli te zaštite moraju biti u skladu s evropskom praksom.